

REGLAMENT ORGANIC

14 de gèr de 1994

(actualizat 2024)

Conselh  Generau d'Aran

TÍTOL PRELIMINAR

CAPITOL UNIC

Article 1.- *(modificat ena session plenària de 14/08/2015)*

1. En exercici dera potestat reglamentària e d'autoorganizacion que li reconeish er article 3 dera Lei 1/2015, de 5 de hereuèr, deth Regim Especiau d'Aran, s'apròve eth present Reglament Organic que regularà era organizacion e foncionament deth Conselh e des sòns diferents organs.

1. Ei objècte deth present Reglament Organic:
 - (a) Regular era estructura organizativa deth Conselh Generau.
 - (b) Regular eth regim de foncionament des organs de govèrn.
 - (c) Esturmentar es procediments de participacion e eth drèt d'informacion des municipis e des ciutadans d'Aran enes activitats deth Conselh.

Article 2.-

1. Es prescripcions d'aguest Reglament s'aplicaràn de manèra preferenta.

2. En aquerò non previst en aguest Reglament, actuarà coma norma supletòria era legislacion que sus eth Regim Locau a aprovat eth Parlament de Catalunya, autant en aspècte d'organizacion coma de foncionament.

3. Era facultat d'interpretar aguest Reglament correspon ath Plen deth Conselh, prealable dictamen dera Secretaria Generau dera institucion o de letrat/ada. Contra es sòns acòrds i poirà càber era via contenciosa administrativa.

TÍTOL PRUMÈR

CAPITOL PRUMÈR

Article 3.- *(modificat ena session plenària de 14/08/2015)*

Cossent damb çò dispausat ena Lei 1/2015, de 5 de hereuèr, deth Regim Especiau d'Aran, es organs essenciaus deth Conselh Generau son:

- eth Plen,
- eth sindic e,
- era Comission d'Oïdors de Compdes.

Article 4.- (modificat enes sessions plenàries de 12/07/1995, de 12/04/1996 e de 14/08/2015)

Son organs complementaris de caractèr permanent:

- eth Conselh de Govèrn,
- es vicesindics,
- es conselhèrs-delegats, e
- eth director executiu.

Article 5.- (modificat ena session plenària de 05/08/1999)

1. Eth Plen e eth sindic, laguens deth sòn ambit de competéncias, designaràn Comissions Especiaus Informatives qu'auràn per objècte er estudi, informe o consulta des ahèrs qu'an d'èster sotmetudi ara decision deth Plen, atau coma eth seguiment dera gestion deth sindic, dera Comission d'Oïdors de Compdes, deth Conselh de Govèrn e des conselhèrs-delegats, sense perjudici des competéncias de contròtle qu'age eth Plen e eth premaniment d'ahèrs concrèts o especifics. Toti es grops politics integrants dera corporacion auràn dret a participar en aguestes Comissions, mejançant era preséncia de conselhèrs que i apartienen.

2. En aguestes Comissions tanben poirà intervier, ath delà des conselhèrs, tecnicos dera corporacion, representants d'ajuntaments, associacions e d'autres personas de reconeishuda qualificacion ena matèria a estudiar. Aguestes Comissions en cap de cas auràn caractèr resolutòri.

Article 6.- (modificat ena session plenària de 14/08/2015)

1. Cossent damb çò qu'establís er article 8 dera Lei 1/2015, de 5 de hereuèr, deth Regim Especiau d'Aran, era lengua pròpria e oficiau dera Val d'Aran ei er aranés.

2. Er usatge dera lengua aranesa e des lengües cooficiaus, catalana e castelhana, serà regulat peth Reglament Especific.

CAPITOL II DES CONSELHÈRS

Article 7.- (modificat ena session plenària de 05/08/1999)

1. Toti es conselhèrs auràn dret, un viatge prenuda possession deth sòn cargue, des aunors, prerrogatives e distincions pròpies deth sòn cargue, cossent damb aquerò establít ena legislacion provinenta deth Parlament de Catalunya o, en sòn defècte, pes que regissen en Estat Espanhòu entàs membres des corporacions locals, en tot èster obligats ath compliment des déuers e obligacions inerents ath madeish.

2. Es membres deth Conselh Generau d'Aran se constituïràn en grops politics, ena forma e damb es drets e obligacions que s'establisquen.

3. Eth Plen deth Conselh Generau, damb cargue ath sòn Pressupòst annau, poirà assignar as grups politics ua dotacion economica qu'aurà de compdar damb un component fixe, parièr entà toti es grups, e un aute variable, en foncion deth nombre de membres de cadun d'eri, laguens des limits qu'en sòn cas dispause damb caractèr generau era Lei de Pressupòsti Generaus der Estat, e sense que se poguen destinar ath pagament de remuneracions de personau de quinsevolh tipe ath servici dera corporacion o ar aqueriment de bens que poguen constituïr actius fixes de caractèr patrimoniau.

4. Es grups politics auràn d'amiar ua compdabilitat especifica d'aguesta dotacion economica, era quau meteràn a disposicion deth Plen deth Conselh Generau tostemp qu'aguest ac demane.

Article 8.-

Eth Plen fixarà es indemnizacions a percéber pes conselhèrs en concèpte d'assisténcia as Plens e Comissions, atau coma es indemnizacions per servicis o activitats deth Conselh Generau damb caractèr non exclusiu.

Article 9.- (modificat ena session plenària de 05/08/1999)

1. Eth Plen aprovarà tanben eth reconeishement deth caractèr de dedicacion exclusiva o parciau des membres deth Conselh Generau, en tot fixar era sua retribucion e era sua conseqüenta nauta en regim generau dera Seguretat Social, en tot assumir eth Conselh Generau eth pagament des quòtes empresariaus que corresponguen, dehòra de çò previst en article 74 LRBRL.

2. Quan i age aquestes retribucions, era sua percepcion serà incompatibla damb era de quinsevolha d'auta retribucion damb cargue as Pressupòsti des Administracions Publiques e des ens, organismes e empreses d'eres dependentes.

Article 10.- (modificat ena session plenària de 05/08/1999)

1. Toti es conselhèrs an dret a obtier informacion sus toti aqueri antecedents, donades e informacion que siguen en poder des servicis dera corporacion e resulten precisi entath desvolopament dera sua foncion.

2. Era informacion serà sollicitada per escrit ath sindic, as efèctes qu'aguest dongue es instruccions oportunes, en menor tèrme de temps possible, as servicis o foncionaris que correspongue.

3. En tot cas, era sollicitud der exercici d'aguest dret d'informacion aurà d'èster resolvuda motivadament enes cinc (5) dies naturaus següents ad aqueth en quau se presentèc. Se se denegüesse er accés ara documentacion informativa, tostemp mejançant resolucion motivada, aquesta poirà èster objècte de recors dauant era Jurisdiccion Contenciosa Administrativa.

Article 11.- (modificat ena session plenària de 12/07/1995)

1. Es conselhèrs, ath delà de çò previst en article anterior, pòràn obtier era informacion dirèctament dera Secretaria dera corporacion o deth Servici o tecnic qu'aguesta mèrque, quan se tracte d'informacion o documentacion sus tèmes includidi en Orde deth dia de sessions convocades d'un organ collegiat deth quau formen part.

2. Tanben auràn accés dirècte ara documentacion corresponenta ara sua competéncia, es presidents des Comissions, es conselhèrs-delegats e eth director executiu.

Article 12.-

1. Es conselhèrs tanben auràn accés dirècte a toti aqueri documents qu'an caractèr de publics, segontes era legislacion vigenta, es Libres d'Actes e de Resolucions, eth Pressupòst, es Ordenances, es Reglaments e es Projèctes e Plans d'Òbres.

2. Tanben an eth caractèr de documents publics de liura consulta es expedients sotmetudi a informacion publica, des dera publicacion deth prumèr anonci dera nomentada informacion.

Article 13.-

Er examen de documents aurà de realizar-se enes dependéncias deth Conselh Generau, en tot proïbir trèir es expedients o documents que les intègren dehòra des burèus deth Conselh Generau, se non ei per miei d'orde judiciau, o autorizacion motivada deth sindic, e prealabla confeccion d'un duplicat damb còpies compulsades pera Secretaria, en tot auer-se de responsabilizar-se personauments, autan dera sua custòdia coma deth bon usatge que hèsque des madeishi era persona qu'a obtiengut era autorizacion.

Article 14.-

Eth dret des conselhèrs ara informacion ara quau se hè referéncia enes articles anteriors, s'entén sense perjudici dera que les pogue correspóner coma vesins o coma persones dirèctament interessades en expedient.

Article 15.-

Se constituís eth Registre d'Interèssi, en quau s'inscriueràn es declaracions de bens e activitats privades productores d'ingrèssi o qu'afècten ar ambit de competéncias deth Conselh Generau, declaracions qu'an de hèr es conselhèrs en moment de préner possession deth cargue, o quan se produsisquen modificacions per escrit en tèrme maxim d'un mes. Era declaracion serà comprensiva dera relacion des bens e des activitats, sense especificar eth valor des bens ne era quantitat des retribucions.

Article 16.-

Eth Registre d'Interèssi serà amiat cossent damb es normes establides entàs Registres generaus e es Libres d'Actes, en tot non èster un registre public e, en conseqüència, er accès ara sua informacion e ara obtienguda de certificacions des inscripcions d'aguest Registre demorarà limitat as supausats enes quaus eth sòn contiengut pogue afectar ara tramitacion d'un expedient o ara validesa d'un acòrd.

Article 17.-

Es conselhèrs seràn notificadi, en domicili per eri nomenat ad aguest efècte, des convocatòries e des actes concrets d'aguest Conselh enes quaus siguen part interessada, personauments o en foncion deth sòn cargue.

Article 18.-

Es conselhèrs auràn eth dret a hèr a servir es Sales d'Amassades entà realizar aqueres sessions de trabalh sus ahèrs relacionadi damb eth sòn cargue, prealabla demana ath sindic o conselhèr-delegat en ahèrs de regim interior.

TÍTOL III
DETH PLEN DETH CONSELH GENERAU

CAPITOL I
SESSIONS E COMPETÈNCIES

Article 19.-

Eth Plen ei er organ suprem de manifestacion dera voluntat deth Conselh Generau d'Aran, e ei integrat per 13 conselhèrs e presidit peth sindic o vicesindic que legauments lo remplace.

Article 20.- *(modificat ena session plenària de 14/08/2015)*

Ei competència deth Plen es senhalades en article 28 dera Lei 1/2015, de 5 de hereuèr, deth Regim Especiau d'Aran, e aqueres que li siguen assignades pes leis sectoriaus.

Article 21.-

Es sessions deth Conselh pòden èster *ordinàries e extraordinàries*, e aguestes darrèrs, ath viatge, pòden èster *urgentes*.

Es *sessions extraordinàries* son convocades entà resòlver ahèrs que precisen èster tractats de manèra singulara o, que per rason d'urgència, non pòden demorar enquiara celebracion dera session ordinària.

CAPITOL II

DERA TRAMITACION DES ACÒRDS A ADOPTAR PETH PLEN

Article 22.- *(modificat ena session plenària de 12/07/1995)*

Es ahèrs des resolucions que corresponguen ath Plen seràn elaborats per organ competent o peth conselhèr-delegat.

Article 23.-

1. Totes es prepauses que requerisquen un quòrum especiau requeriràn er informe prealable dera Secretaria e quan es prepauses siguen de caractèr economic o supausen un increment des despenes previstes, dera Intervencion.

2. Tanben seràn de besonh aguesti informes enes matèries següentes:

- Aprobacion deth pressupòst e des sues modificacions.
- Plantilhas de personau.
- Contractacion d'òbres e de gestion de servicis publics.

CAPITOL III

CONVOCATÒRIA DES PLENS E ORDE DETH DIA

Article 24.- *(modificat enes sessions plenàries de 12/07/1995 e de 05/08/1999)*

1. Eth Plen deth Conselh s'amassarà en session plenària ordinària, coma minim, cada dus mesi e en session extraordinària quan atau ac decidisque eth sindic o ac sollicite era quatau part, aumens, deth nombre legau des conselhèrs deth Conselh Generau, sense que cap de conselhèr ne pogue sollicitar mès de tres annaments.

2. Enes Plens ordinaris era part dedicada ath contròtle des auti organs deth Conselh Generau aurà de presentar ua substantivitat pròpria e diferenciada dera part resolutiva, en tot auer-se de garantir de forma efectiva en sòn foncionament e, en tot cas, ena sua regulacion, era participacion de toti es grups politics ena formulacion de plecs, demandes e mocions.

Article 25.- Sessions Plenàries Ordinàries *(modificat enes sessions plenàries de 12/05/1995, de 05/08/1999, de 14/07/2003, de 20/07/2007, de 12/07/2011, de 15/06/2015, de 16/07/2019, de 23/11/2020 e 30/06/2023)*

1. Es sessions ordinàries se celebraràn eth **dusau diuendres** deth prumèr mes de cada bimèstre, ei a díder gèr, març, mai, junhsèga, seteme e noveme.

2. S'eth dia preestablit entara celebracion dera session ordinària coincidís damb dia hestèr poirà celebrar-se eth Plen, damb eth madeish caractèr ordinari, eth dia anterior o eth posterior.

3. Era ora de celebracion serà preferentament **tàs 09.00 ores**, se ben açò se pòt modificar per acòrd deth Plen damb eth vòt favorable dera majoria absoluta des conselhèrs.

4. Se faculte ara Sindicatura pr'amor qu'en cas justificat e prealabla informacion as Magnifics conselhèrs portavèus des grops politics qu'intègren era corporacion, se pogue variar eth dia previst entara corresponenta session ordinària

Article 26.- Convocatòria des Sessions

Es sessions ordinàries seràn convocades damb ua auança minima de dus dies obrants. Es extraordinàries damb 48 ores, e es extraordinàries damb caractèr d'urgència, damb era auança qu'eth sindic creigue convenienta, en tot auer-se de ratificar era urgència coma prumèr punt der Orde deth dia, damb eth vòt favorable dera majoria absoluta des membres assistents ath Plen; en cas d'empat, dirimirà eth vòt de qualitat deth sindic.

Article 27.- Liurament des Convocatòries

Era convocatòria serà liurada a cadun des conselhèrs en domicili designat per eri as efèctes de recéber notificacions.

Article 28.-

Era terminologia a utilizar sus es documents que seràn sotmetudi a examen des organs collegiats serà era següenta:

- * PREPAUSA.- Document que contien eth tèxte d'un acòrd a adoptar per un organ collegiat, formulat pes servicis deth Conselh o per un conselhèr-delegat.
- * ESMENDA.- Tèxte alternatiu totau o parciau a ua prepausa formulada per un conselhèr.
- * ESMENDA TRANSACCIONAU.- Ei aquera esmenda que se presente orauments damb era finalitat d'establir un tèxte de compromís entre era prepausa o ua o mès esmendes.
- * MOCION.- Prepausa d'acòrd que se sotmet ath Plen, per un o mès conselhèrs.
- * PREC.- Demana d'un conselhèr dirigida ath sindic o a un conselhèr-delegat sus un ahèr concret dera sua competència.
- * PREGUNTA.- Question dirigida ath sindic o a un conselhèr-delegat en matèria dera sua competència e que requerís una respòsta, orau o escrita.

Article 29.-

1. Er Orde deth dia serà confeccionat peth sindic.
2. En Orde deth dia s'includiràn totes es mocions presentades pes conselhèrs laguens deth tèrme previst en article següent.
3. Ena convocatòria des sessions ordinàries, s'acompanharà còpia dera acta dera session o sessions anteriores.

Article 30.-

1. Es Mocions seràn presentades per escrit ena Secretaria dera corporacion, damb un minim de ueit (8) dies obrants abantes dera celebracion deth Plen.
2. Es Precs e Demandes poiràn realizar-se enes Plens Ordinaris per escrit o orauments en punt der Orde deth dia corresponent ad aguestes.
3. Eth sindic poirà autorizar que siguen incluides enes sessions, es Mocions presentades qu'incomplisquen eth tèrme dera antellacion establida, s'an relacion damb quauque ahèr der Orde deth dia, se son de manifèsta urgècia o se atau se sollicite en madeish escrit.
4. As Mocions s'acompanharà era documentacion dera quau se dispause entara sua justificacion. Es conselhèrs que presenten ua mocion poiràn sollicitar, en cas que non sigue preceptiu er informe, qu'es Mocions presentades siguen informades prealablament en sòn includiment en Orde deth dia pera Secretaria o pera Intervencion dera corporacion, es quaus dispausaràn de ueit dies entara sua realizacion.

Article 31.-

Es expedients corresponents as prepauses incluides ena Orde deth dia seràn a disposicion des membres deth Conselh des deth moment dera convocatòria ena Secretaria dera corporacion pendent er orari de burèu.

Article 32.- (modificat ena session plenària de 05/08/1999)

1. Es Plens se celebraràn ena Sala de sessions dera sedença oficiau deth Conselh Generau d'Aran, o ben ena Sala de sessions dera Casa deth Senhor d'Arròs abilitada ar efècte, en vertut d'acòrd plenari de 24 de hereuèr de 1999.
2. Se per motius de fòrça majora era session non se poguesse celebrar enes lòcs nomentadi, eth Plen poirà acordar era celebracion dera session en un aute lòc apropiat.

Article 33.-

Quan eth debat e estudi des ahèrs ac requerisquen, eth sindic poirà suspéner temporauments era session, en tot remercar eth moment dera sua reanudacion. Totes es suspensions se haràn a constar ena acta, en tot especificar era ora dera suspension e deth reinici. Tanben se harà a constar es variacions enes conselhèrs assistents.

Article 34.-

Es acòrds des Plens seràn executius un còp acabada era session ena quau siguen adoptats.

Article 35.-

Era convocatòria deth Plen damb er Orde deth dia serà fixada en taulèr d'anoncis deth Conselh e des ajuntaments d'Aran, e tanben se procurarà dar a conéisher as miejans de comunicacion d'Aran.

Article 36.-

1. Es Plens deth Conselh seràn publics mès en tot poder èster secrets eth debat e era votacion d'aqueri ahèrs que poguen afectar eth dret fundamentau des ciutadans ath quau hè referéncia er article 18.1 dera Constitucion Espanhòla, quan atau ac acòrde eth Plen per majoria absoluta.

2. Era celebracion d'un Plen o de quinsevolh des punts der Orde deth dia a pòrta barrada se harà a constar ena convocatòria.

Article 37.-

1. Un còp debatut cadun des punts der Orde deth dia peth sindic, se sosmeterà a votacion, se procedís e s'aprovarà per majoria relativa, en tot èster diriment, en cas d'empat, eth vòt de qualitat deth sindic.

2. Aquerò dispausat en paragraf anterior s'entén tostemp a resèrva d'aqueres qüestions a debàter que requerisquen un quòrum especiau; en aquest cas, era majoria aurà d'èster absoluta.

CAPITOL IV
DETH DESVOLOPAMENT DES SESSIONS

Article 38.-

Eth Plen serà validament constituït damb era preséncia d'un tèrç, coma minim, deth nombre de conselhèrs que legauments lo compausen e aurà de mantier-se des deth començament enquiara fin dera amassada. En tot cas, serà de besonh era preséncia deth sindic e deth/dera secretàri/ària o des persones que legauments les remplacen.

Article 39.-

1. Quinsevolh abandon dera Sala per part d'un/a conselhèr/a requerirà era comunicacion ath/ara secretari/ària a efèctes deth recompte deth quòrum.
2. Er abandon dera Sala, un còp començada era deliberacion d'un punt dera Orde deth dia, s'entenerà, a efèctes dera votacion corresponenta, coma abstencion.
3. Se pendent era session, eth nombre de conselhèrs presents arribèsse a èster inferior ath minim previst en article anterior, eth sindic lueuarà era session un còp s'age votat eth punt der Orde deth dia que se debate.

Article 40.-

1. Eth primèr punt der Orde deth dia enes sessions ordinàries se dedicarà ara lectura e aprobacion dera acta dera session anteriora, en tot non èster de besonh era sua lectura en cas d'auer estat trametuda còpia dera acta amassa damb era convocatòria dera session.
2. Enes sessions extraordinàries, eth sindic poirà tanben dedicar eth primèr punt dera Orde deth dia ara lectura e aprobacion dera acta dera session anteriora mès non ac poirà hèr atau, enes convocatòries damb caractèr d'urgéncia, enes quaus aguest punt se dedicarà ara ratificacion dera urgéncia.
3. Eth dusau punt der Orde deth dia des sessions ordinàries se dedicarà a informacion deth sindic.
4. Es darrèrs punts dera Orde deth dia des sessions ordinàries se dedicaràn a debàter e respòner es Precs e Demandes.
5. En moment de passar a debàter ua prepausa, era aprobacion dera quau requerisque un quòrum especiau, se poirà comprovar eth nombre de conselhèrs assistents.
6. Eth sindic, a iniciativa pròpria o a peticion d'un conselhèr, poirà alterar er orde de discussion e votacion des prepauses, quan atau ac aconsèlhe eth corrècte desenvolupament dera session.

Article 41.-

Abantes de començar eth debat d'ua prepausa, se un conselhèr se trape en quinsevolh des supausats d'interès dirècte previsti ena Lei de Regim Juridic des Administracions Publiques e deth Procediment Administratiu Comun, ac meterà de manifest e serà autorizat peth sindic a retirar-se deth Plen enquia que sigue acabada era votacion. Aquesta circumstància se harà a constar ena acta.

Article 42.-

Toti es conselhèrs auràn de sollicitar e obtier deth sindic era intervencion en debat, en tot non poder èster copat er usatge dera madeisha; sonque eth sindic poirà intervier entà her-li a saber que s'a acabat eth sòn temps d'intervencion, entà demanar-li que se limite ath tèma objècte de debat o entà retirar-li era paraula per desviar-se deth tèma tractat reiteradament o per hèr usatge reiterat d'expressions qu'atenten contra era dignitat e respècte des demès conselhèrs e des institucions.

Article 43.-

1. Dubèrt eth debat, eth sindic o eth conselhèr-delegat harà era presentacion der ahèr. Acte seguit, se i auesse esmenes, se darà era paraula as sòns presentadors.
2. Cada orador dispausarà de tres minutes entara sua argumentacion es quaus poirà èster prorrogadi peth sindic, s'era complexitat deth tèma atau ac demane.
3. Acte seguit, eth ponent expressarà s'assumís quauqu'ua o totes es esmenes.
4. En aguest punt, se poirà formular pes presentadors d'esmenes o peth ponent esmenes transaccionaues.
5. Acabat eth debat, se passarà a votar es esmenes non assumides e se son refusades, se mantierà eth tèxte originau.
6. Finauments, eth debat se sosmeterà a votacion en blòc deth tèxte definitiu.

Article 44.-

Quinsevolh conselhèr poirà intervier per allusions personaues sonque un còp e pendent un temps maxim d'ua menuta, immediatament dempús dera intervencion que conten es allusions.

Article 45.-

Eth sindic poirà deishar un ahèr sus era taula:

- Quan ac sollicite un conselhèr qu'age presentat era mocion.
- Quan a prepausa d'un conselhèr, eth Plen acòrde retornar er expedient ath conselhèr-delegat entà un mielhor estudi.

CAPITOL V
DERA PETICION DE PLENS EXTRAORDINARIS

Article 46.-

1. Un grop de conselhèrs que represente, coma minim, era quatau part des membres que legauments compausen eth Conselh poirà sollicitar ath sindic era convocatòria d'un Plen Extraordinari.
2. Era peticion se presentarà en Registre Generau e serà de besonh acompanhar-la der ahèr a tractar, era prepausa d'acòrd e era memòria o documentacion justificativa.

Article 47.- (modificat ena session plenària de 05/08/1999)

1. Eth sindic justificarà era recepcion dera peticion e senhalarà eth dia en quau se celebrarà era session sollicitada. Eth dia senhalat non poirà demorar- se per mèts de quinze (15) dies obrants des dera entrada dera peticion en Registre Generau e non se poirà incorporar er ahèr ar Orde deth dia d'un Plen ordinari o d'un aute extraordinari damb mèts ahèrs se non ac autorizen exprèssament es sollicitants dera convocatòria.
2. S'eth sindic non convoquésse eth Plen Extraordinari sollicitat peth nombre de conselhèrs indicat laguens deth tèrme senhalat, demorarà automaticament convocat entath detzau (10) dia obrant següent ath dera finalizacion d'aguest tèrme, entàs 12 ores, era quau causa serà notificada pera Secretaria deth Conselh a toti es sòns membres londeman dera finalizacion deth tèrme nomenat.
3. En abséncia deth sindic o de qui legauments age de substituir-lo, eth Plen demorarà validament constituït tostemp que concórre era tresau part deth nombre legau de membres dera corporacion, que jamès poirà èster inferior a tres, quòrum que s'aurà de mantier pendent tota era session e serà presidit peth membre dera corporacion de majora edat entre es presents.
4. Sonque poirà denegar-se era peticion en resolucion motivada quan eth contiengut d'aguesta sigue manifestament contrària a dret, segontes informe dera Secretaria deth Conselh o deth/dera letrat/ada.

CAPITOL VI
DERA MOCION DE CENSURA

Article 48.- (modificat ena session plenària de 05/08/1999)

Era Mocion de Censura ath sindic se regularà pera legislacion electorau vigenta e per aguest capitol, cossent damb es normes següents:

- (a) Era Mocion de Censura l'a de prepausar, coma minim, era majoria absoluta deth nombre legau de membres deth Conselh Generau e a d'includir un/a candidat/a ara Sindicatura, que pòt èster quinsevolh/a conselhèr/a, era acceptacion exprèssa deth/dera quau a de constar en escrit de proposicion dera Mocion.

- (b) Er escrit en que se prepausa era Mocion de Censura a d'includir es signatures validades degudament per un notari o pera Secretaria Generau deth Conselh, e s'a de presentar dauant aguesta Secretaria per quinsevolh des qui lo signen. Era Secretaria Generau a de comprovar qu'era Mocion de Censura reunís es besonhs exigits pera lei e a d'estiéner en madeish acte era diligéncia acreditativa corresponenta.
- (c) Eth document atau diligenciat lo presentarà en Registre Generau deth Conselh Generau quinsevolh des signants dera Mocion, e eth Plen demore convocat de manèra automatica tàs 12 ores deth detzau (10) dia obrant següent ath deth Registre. Era Secretaria Generau a de traméter ua notificacion indicativa d'aguesta circumstància a toti es membres deth Conselh Generau en tèrme maxim d'un dia, a compdar dera presentacion deth document en registre, as efèctes d'assisténcia ara session, en tot especificar-ne era data e era ora.
- (d) Eth Plen serà presidit per ua Mèsa d'Edat, integrada pes conselhèrs de mèns e mens edat des presents, excluidi eth sindic e eth/era candidat/a ara Sindicatura, e actue coma secretari/ària qui ne sigue dera corporacion, eth/era quau a d'acreditar aguesta circumstància.
- (e) Era Mèsa se limite a liéger era Mocion de Censura, a concedir era paraula pendent un temps brèu, se i son presents, ath/era candidat/a ara Sindicatura, ath sindic e as portavotzs des grops politics, e a sosméter a votacion era Mocion de Censura.
- (f) Eth/era candidat/a includit/ida ena Mocion de Censura demore proclamat/ada sindic/a s'era mocion prospère damb eth vòt favorable dera majoria absoluta deth nombre de conselhèrs que compausen legauments eth Conselh Generau d'Aran. Aprovada ua Mocion de Censura, eth/era candidat/a elècte7a prenerà, en madeish acte, possession deth cargue de sindic/a e balharà eth jurament o era promesa legauments exigida.

Article 49.- (modificat ena session plenària de 05/08/1999)

Cap de conselhèr non pòt signar pendent eth sòn mandat mèns d'ua Mocion de Censura. Ad aguesti efèctes, non s'an en consideracion es Mocions que non agen estat tramitades peth hèt de non reünir es requisits que previé era letra b) der article anterior.

Article 50.- (modificat ena session plenària de 05/08/1999)

Era dimission subervienguda deth sindic non suspen era tramitacion e era votacion dera Mocion de Censura.

Article 51.-

Eth procediment entath debat e votacion dera Mocion de Censura serà eth normau ath de quinsevolha prepausa d'acòrd que requerisque era majoria absoluta, ei a díder, eth vòt favorable dera meitat mèns un des membres de dret deth Conselh, damb es particularitats següentes:

1. Eth temps d'intervencions se poirà alongar enquias 15 minutes.
2. Eth prumèr en préner era paraula serà eth/era candidat/a que dispausarà de 15 minutes entà expausar eth sòn programa de govèrn.
3. Acte seguit, eth sindic darà era paraula as conselhèrs que donguen supòrt ara Mocion e, finauments, darà era paraula as conselhèrs que s'opòsen ara Mocion.
4. Eth darrèr en préner era paraula, se atau ac desire, serà eth sindic, eth quau expressarà e definirà es rasons entà continuar ostentant eth cargue.

Article 52.- *(modificat ena session plenària de 05/08/1999)*

Eth sindic, en exercici des sues competéncies, ei obligat a impedir quinsevolh acte que perturbe, obstaculise o impedisque eth dret des membres dera corporacion a assistir ara session plenària en qué se vòte era Mocion de Censura e a exercir eth sòn dret ath vòt ena session. En especiau, non son aplicables ara Mocion de Censura es causes d'abstencion e recusacion que previé era Lei 30/1992, de 26 de noveme.

Article 52 bis.- *(ahijut ena session plenària de 05/08/1999 e modificat ena session plenària de 14/08/2015)*

Era qüestion de confidança se regularà cossent damb çò previst en article 45 dera Lei 1/2015, de 5 de hereuèr, deth Regim Especiau d'Aran.

CAPITOL VII

DERA COMISSION D'OÏDORS DE COMPDES

Article 53.-

Era Comission d'Oïdors de Compdes ei designada especiauments entà revisar e informar es compdes deth Conselh e de toti es organismes autonòms que d'eth ne depenen, corresponents ar exercici anterior.

Article 54.-

Ena Comission d'Oïdors de Compdes auràn d'èster representats toti es partits politics damb representacion en Conselh, en tot representar damb un vòt ponderat as conselhèrs deth sòn grop.

Article 55.-

1. Acabat er examen e revision des compdes, era Comission emeterà un informe en quau se harà a constar, s'arribèsse eth cas, totes es irregularitats e defèctes que s'agen observat e es prepauses que se hèsquen ath Plen entara sua correccion. Es membres dera Comission poirà hèn a constar ara fin der informe, damb caractèr de vòt particular, es observacions e prepauses que non agen estat recuelhudes.

2. Er informe dera Comission aurà d'èster emetut en tèrme maxim de dus (2) mesi a compdar des deth moment en que li age estat balhada era documentacion complèta.

Article 56.-

Es Compdes e er informe dera Comission seràn expausadi ath public per un periòde non inferior a quinze (15) dies e, ara seguida, enviats ath Plen entara sua aprobacion o rectificacion.

Article 57.-

Era Comission d'Oïdors de Compdes poirà sollicitar era collaboracion e er assessorament de tecnicos especialistes, atau coma era contractacion d'un servici d'auditoria extèrna.

TÍTOL IV
DES ORGANS EXECUTIUS

CAPITOL I
DETH SINDIC

Article 58.- *(modificat ena session plenària de 14/08/2015)*

Eth sindic a es atribucions que li assigne er article 29 dera Lei 1/2015, de 5 de hereuèr, deth Regim Especiau d'Aran.

Article 59.-

En cas d'absència o impediment, le remplaçarà enes sues foncions es vicesindics per orden de prelacion deth sòn nomentament. Era substitucion non poirà auer efèctes per un periòde superior a dus (2) mesi.

Article 60.-

1. Es decretès e resolucions deth sindic s'inscriueràn en Libre de registre corresponent.

2. Entad aguest registre, serà d'aplicacion era normativa establida entàs Libres d'actes.

CAPITOL II
(modificat ena session plenària de 14/08/2015)
DERA COMISSION BILATERAU GOVÈRN DERA GENERALITAT –
CONSELH GENERAU D'ARAN

Article 61.- *(modificat en sessions plenàries de 19/03/2004 e de 14/08/2015)*
Cossent damb çò qu'establís er article 4.3 deth Reglament d'organizacion e foncionament dera Comission Bilaterau Govèrn dera Generalitat – Conselh Generau d'Aran, eth Plen deth Conselh escuelherà cinc representants deth Conselh entà formar part dera Comission Bilaterau Govèrn dera Generalitat – Conselh Generau d'Aran prevista en article 84 dera Lei 1/2015, de 5 de hereuèr, deth Regim Especiau d'Aran. Eth siesau representant ei eth sindic que serà copresident dera Comission.

Article 62.-

Toti es partits politics representadi en Conselh auràn dret a auer un representant ena Comission tostemp qu'eth sòn nombre sigue superior a quate; en cas contrari, quan agen ua representacion minoritària auràn d'agropar-se entà designar sonque un representant.

CAPITOL III DES CONSELHÈRS DELEGATS

Article 63.-

Eth sindic poirà delegar es sues funcions executives en un o mès conselhèrs-delegats entà actuacions concrètes o per airaus sectoriaus.

Article 64.-

Cada conselhèr-delegat exercirà es funcions de direccion e gestion des servicis ath sòn cargue e formularà ath sindic o as organs collegiats es prepauses que considèrè apropiades en sòn ambit de competéncias.

Article 65.-

Era delegacion se harà per decret deth sindic, eth quau especificarà era estienuda des ahèrs que compren, es facultats que se delèguen, atau coma es condicions deth sòn exercici.

CAPITOL IV DETH CONSELH DE GOVÈRN

Article 66.- *(modificat en session plenària de 12/07/1995)*

Eth Conselh de Govèrn ei integrat peth sindic e es tres vicesindics que seràn nomentats entà formar part d'aguest Conselh per decret deth sindic.

Article 67.-

Ei competéncia deth Conselh de Govèrn er assessorament e assisténcia ath sindic, er estudi de totes es prepauses que aguest li sosméte, atau coma es que

li presenten es conselhèrs-delegats, e era adopcion d'acòrds sus competéncias en eth delegades peth sindic e peth Plen deth Conselh.

Article 68.- Sessions Ordinàries deth Conselh de Govèrn (modificat enes sessions plenàries de 12/07/1995, de 05/08/1999, de 14/07/2003, de 20/07/2007, de 12/07/2011, de 15/06/2015, de 16/07/2019, de 23/11/2020 e 30/06/2023)

1. Eth Conselh de Govèrn celebrarà es sessions ordinàries damb ua periodicitat quizenau. Eth dia de celebracion serà es deluns dera prumèra e tresau setmana de cada mes, **tàs 9.00 ores**. Non i aurà cap de session ordinària pendent eth mes d'agost.

2. S'eth dia preestablit entara celebracion dera session ordinària coincidís damb dia hestèr, serà d'aplicacion çò previst en article 25 d'aguest Reglament.

Article 69.-

1. Correspon ath sindic era convocatòria deth Conselh de Govèrn e era determinacion der Orde deth dia.

2. Era convocatòria deth Conselh de Govèrn se realizarà damb un minim de dus dies d'auança.

Article 70.-

Eth sindic poirà convocar sessions deth Conselh de Govèrn damb caractèr extraordinari e damb caractèr d'urgéncia, en tot èster d'aplicacion aquerò previst entàs sessions plenàries d'aguest tipe, atau coma en aquerò referent ath contengut der Orde deth dia.

Article 71.-

1. Eth Conselh de Govèrn serà validament constituït damb era assisténcia dera majoria des sòns membres, damb un minim de tres.

2. Es sessions deth Conselh de Govèrn non son publiques.

Article 72.-

Es acòrds deth Conselh de Govèrn se prenen per majoria simple e, en cas d'empat, decidirà eth vòt qualificat deth sindic.

Article 73.-

Des sessions se lheuarà acta, damb era madeisha solemnitat qu'es actes deth Plen. Un còp sigue aprovada, se trameterà a toti es conselhèrs, e s'expausarà en taulèr d'anoncis dera sedença deth Conselh Generau.

Article 74.- *(modificat ena session plenària de 12/07/1995)*

Eth sindic designarà tres vicesindics que lo remplaçaràn per orde de nomentament, en cas de vacant, absència o malautia.

Article 75.-

Es vicesindics formaràn part deth Conselh de Govèrn.

Article 76.-

Eth sindic designarà o revocarà liurament as vicesindics, mejançant decret, que serà notificat as interessats, notificat ath Plen deth Conselh Generau e publicat en BOP.

CAPITOL VI PODER EXECUTIU

Article 77.- *(modificat ena session plenària de 14/08/2015)*

Eth director executiu aurà caractèr de **personau directiu professionau**.

Article 78.- *(modificat ena session plenària de 14/08/2015)*

Eth director executiu serà nomentat e separat entath cargue nomentat **cossent damb çò que dispause er article 13 dera Lei 7/2007, de 12 d'abriu, der Estatut Basic der Emplegat Public, e d'acòrd damb eth desenvolopament que ne hèsque era Generalitat de Catalunya en execucion des competéncies pròpies en aguesta matèria**.

Article 79.- *(modificat ena session plenària de 14/08/2015)*

Eth director executiu aurà atribuïdes es competéncies que li siguen exprèssament delegades peth Plen, o peth sindic, damb es delimitacions qu'establís **eth Decret Legislatiu 2/2003, de 28 d'abriu, peth quau s'apròve eth Tèxte Rehonut dera Lei Municipau e de Regim Locau de Catalunya**, e, en sòn defècte, era Lei 7/1985, de 2 d'abriu, Reguladora des Bases de Regim Locau.

CAPITOL VII

(suprimit ena session plenària de 14/08/2015)

Article 80.- *(suprimit ena session plenària de 14/08/2015)*

Article 81.- *(suprimit ena session plenària de 14/08/2015)*

Article 82.- *(suprimit ena session plenària de 14/08/2015)*

Article 83.- *(suprimit ena session plenària de 14/08/2015)*

Article 84.- *(suprimit ena session plenària de 12/07/1995)*

TÍTOL V
DERA PARTICIPACION

CAPITOL I
DERA PARTICIPACION DES MUNICIPIIS

Article 85.-

En tot poder afectar es decisions deth Conselh Generau es interèssi des municipis dera Val d'Aran, es organs executius deth Conselh Generau poirà consultar as ajuntaments afectadi sus es expedients que siguen en tramitacion, en tot facilitar-les tota era informacion de besonh entath sufisent coneishement dera prepausa.

Article 86.-

Era consulta serà remetuda as ajuntaments afectadi es quaus dispausaràn d'un tèrme d'un mes entà examinar era prepausa e realizar es allegacions que considèren convenientes.

Article 87.-

As efèctes de consulta, er organ qu'a d'elaborar era prepausa d'acòrd poirà convocar as bailes des municipis afectadi.

Article 88.-

Ethl sindic convocarà cada tres (3) mesi ua session extraordinària deth Conselh de Govèrn as quaus seràn convidadi a assistir es bailes des municipis d'Aran e damb sonque un punt en Orde deth dia "*Consulta as ajuntaments d'Aran*", en tot èster eth caractèr d'aguesta amassada deliberatòria.

Article 89.-

Damb ua periodicitat annau, en mes de deseme de cada an, eth sindic convocarà ua amassada de caractèr informativa e consultiva, ara quau seràn convidadi toti es membres deth Conselh Generau e toti es bailes d'Aran.

CAPITOL II
DERA PARTICIPACION CIUTADANA

Article 90.-

1. Eth Conselh Generau d'Aran reconeish eth dret des ciutadans d'Aran a recéber ua informacion puntuau, ampla e objectiva sus es activitats deth Conselh.
2. Eth Conselh Generau darà difusion as convocatòries des Plens e era publicitat de besonh des acòrds adoptadi, atau coma de toti es auti actes publics que celèbren es organs deth Conselh Generau.

Article 91.-

Eth Conselh Generau collaborarà damb es entitats publicas e privades qu'auràn coma objectius fondacionaus activitats que siguen de competència pròpia deth Conselh o der interès public d'Aran.

Article 91 bis.-

As efèctes dera nomentada collaboracion, eth Conselh Generau mantierà un Registre d'Entitats Publicas e Privades der ambit d'Aran o d'ambit superior e qu'actüen en Aran, en quau se hèsque a constar era sua constitucion, legislacion, objectius e activitats.

TÍTOL VI
CONSELH DE BAILES

Article 92.- Objècte (*hijut ena session plenària de 30/10/2007 e modificat ena session plenària de 18/09/2017*)

Eth Conselh de Bailes serà er òrgan consultiu e de participacion des municipis e entitats municipaus descentralizades d'Aran damb eth Conselh Generau d'Aran.

Aguest òrgan aurà de garantir era collaboracion e coordinacion, entà servir damb eficacitat e eficiència es interèssi d'Aran e des sues collectivitats, damb plen respècte vèrs es competències e era autonomia respectives.

Article 93.- Regim de Foncionament (*hijut ena session plenària de 30/10/2007 e modificat ena session plenària de 18/09/2017*)

1. Eth Conselh de Bailes s'amassarà de forma ordinària un còp cada sies mèsi, e de forma extraordinària cada còp qu'atau ac considèrè de besonh eth sindic d'Aran.

2. Era sua convocatòria e era elaboracion der Orde deth dia de cada amassada des Conselhs de Bailes ei atribuïda ath sindic d'Aran, e aurà d'èster realizada damb ua setmana d'auança ara sua celebracion.

3. Eth sindic d'Aran presidirà es Conselhs de Bailes.

4. Es membres deth Conselh de Bailes poiràn prepausar ath sindic d'Aran er includiment d'ahèrs que considèren an d'èster tractadi en aguest Conselh, en tot hèr-los arribar prealablement ath sindic d'Aran damb un tèrme d'auança de quinze dies ara sua convocatòria.

5. Er Orde deth dia incluirà tostemp un darrèr punt reservat a Precs e Demanes.

6. Eth lòc d'amassada d'aguest Conselh de Bailes serà era sedença deth Conselh Generau d'Aran, principaments o ena vila o pòble que liurament pogue designar ar efècte eth sindic d'Aran.

7. Eth Conselh de Bailes, cossent damb eth sòn caracter consultiu e de participacion, serà eth lòc on eth Sindic d'Aran informe sus es prepauses qu'agen interès entàs municipis que siguen prebotjades des deth Govèrn d'Aran. Atau madeish, es membres deth Conselh de Bailes poiran presentar, entat sòn debat, prepauses d'actuacion d'interès entath país.

Article 94.- Composicion (hijut ena session plenària de 30/10/2007 e modificat ena session plenària de 18/09/2017)

1. Eth Conselh de Bailes serà compausat pes persones que seguissen:

- Eth sindic d'Aran
- Es conselhèrs elèctes deth Conselh Generau d'Aran
- Es bailes des corporacions municipaus d'Aran
- Es bailes des Entitats Municipaus Descentralizades d'Aran
- Excepcionauments e prealabla convocatòria deth sindic d'Aran, poirà assistir ad aguesti Conselhs es tecnicos deth Conselh Generau d'Aran que per ahèrs referidi en Orde deth dia dera session convocada poguen, a peticion deth sindic d'Aran, informar sus es matèries a tractar
- Excepcionauments, es bailes pòden delegar era sua assisténcia en un tinent alcalde o regidor

2. Es Conselhs de Bailes son barrades ath public mès es sòns acòrds e informes seran publicadi ena sedença electronica deth Conselh Generau d'Aran as efèctes dera publicitat e transparéncia que regule era Lei 19/2014, de 29 de desembre.

Disposicion Addicionau.- (modificada enes sessions plenàries de 05/08/1999 e de 14/08/2015)

Tot aquerò que non sigue previst en aguest Reglament, ne serà d'aplicacion era Lei 1/2015, de 5 de hereuèr, deth Regim Especiau d'Aran; eth Decret Legislatiu 2/2003, de 28 d'abriu, peth quau s'apròve eth Tèxte Rehonut dera Lei Municipau e de Regim Locau de Catalunya; eth Decret Legislatiu 4/2003, de 4 de noveme, peth quau s'apròve eth Tèxte Rehonut dera Lei d'Organizacion Comarcau de Catalunya; era Lei 7/1985, de 2 d'abriu, Reguladora des Bases de Regim Locau; eth Reiau Decret 2568/1986, de 28 de noveme, peth quau s'apròve eth Reglament d'Organizacion, Foncionament e Regim Juridic des Ens Locaus; eth Reiau Decret Legislatiu 2/2004, de 5 de març, peth quau s'apròve eth Tèxte Rehonut dera Lei Reguladora des Isendes Locaus, e d'auta legislacion concordanta e complementària, en tot auer en

compde qu'en cas de discrepàncies auràn de prevaler es leis autonòmiques sus aquest Reglament Organic.

Disposicion Finau.-

Eth present Reglament entrarà en vigor ath londeman dera sua publicacion en BOP.